

Be il meglia dal meglia per il giubileum

San Murezzan: Oz è l'avertura dal 20. gourmet festival

DA GION NUTEGN STGIER / ANR

■ **Stailas, chapitschas e puncts da «Gault Millau» gist en seria, quai è la noda da l'ediziun da giubileum dal gourmet festival 2013 a San Murezzan e conturn. Cuschiniers da set naziuns èn da la partida e vegnan a pupragnar ils passa 3000 mangiabains cun tratgas las pli finas.** Senza dubi tutga il gourmet festival en l'Engiadin'Ota tar ils meglia dal mund. I dat paucas occurrenz per persunas cun buccas e nas fins che sveglian tant interess sco il gourmet festival che entschaiva oz a San Murezzan. Ils davos 20 onns èn 60 000 gourmets vegnids a la fin da schaner en il lieu turistic da renum mundial be per l'occurrènz culinaria. Remartgabel è bain che da quels mangiabains derivan 80% da la Svizra, 10% èn gourmets da la Germania, 5% èn Talians ed ils auters 5% da differents naziuns. 173 cuschiniers da 31 naziuns èn sa participads ils davos 20 onns al gourmet festival. L'ediziun da giubileum dals dis culinaries cumenza oz e va a fin venderdi proxim cun in past festiv en l'hotel Carlton a San Murezzan.

Ina purschida zunt vasta

L'Engiadin'Ota è ina regiun cun ina gastronomia da qualitad fitg auta e cun almain 25 restaurants che figureschan en il «Gault Millau», la pli enconuschenta bibla per gourmets. Grazia al gourmet festival vegn quella purschida culinaria enritgida anc supplementar-main cun dar ils stars cuschinunzs novs impuls a la gastronomia da San Murezzan e conturn. Cun esser ils giasts cuschiniers bunamain in'emna in ils hotels e restaurants da luxus è la purschida tar il gourmet festival zunt vasta. I dat da tuttas sorts occurrenz culinaries e quai per pretschs da 185 fin 600 francs. Ils pretschs èn dentant secundars cun vegnir ils giasts en rotscha per giudair las tratgas exquisitas dals cuschiniers internaziunals. Da la cu-



Ina giada daplì èsi reussi a Reto Mathis, il president da l'emna culinaria a San Murezzan e conturn, da persvader ils meglia cuschinunzs dal mund da vegnir a San Murezzan.

schiniera e dals otg cuschinunzs ch'èn quest onn da la partida han tuts retschet ina sche betg duas ubain trais stailas «Michelin» e puncts suren e suror èn lur vita professionala.

Il meglia cuschinunz talian

L'emna culinaria entschaiva er quest onn cun in dals puncts culminants e quai questa saira cun la «welcome cocktail party». Fin uss aveva quella adina lieu en l'hotel Carlton a San Murezzan e da preschent ha quella lieu en il «Grand Hotel Kempinski». Quella occurrènz è ina da las paucas nua che tuts cuschiniers èn da la partida e nua ch'i vegn en quel senn fatg in vair viadi

culinaric. Cun *Cornelia Poletto*, la cuschinunza da Hamburg, è preschenta ina da las meglras cuschinieras dal mund che ha er fatg ina carriera sco cuschinunza tar la televisiun «ZDF». Da Saarbrücken a San Murezzan vegn *Klaus Erfort*, in cuschinier che ha tuttina 19,5 puncts «Gault Millau», quai che betg blers han sin l'entir mund. Trais stailas «Michelin» ha dentant er il cuschinunz *Gert de Mangeleer* che vegn da la Belgia ed è giast da *Kurt Rössli*, il schef cuschinier da l'hotel Waldhaus, Segl. In'emna culinaria senza cuschiniers da la Frantscha è strusch da s'imaginar e quest onn vegn cun *Alain Solivèrès* in cuschinunz da Paris e l'auter è

Jean-Georges Klein dal restaurant da luxus L'Arnsbourg en l'Alsazia. Per ina giada è er da la partida cun *Dieter Koschina* in cuschinunz da renum dal Portugal, dentant nagins cuschiniers svizzers. Persuenter cuschina cun *Massimo Bottura*, il meglia cuschinunz talian, en il Palace a San Murezzan. El maina dapi onns cun success l'Osteria Franciscana a Modena, dal reminent il 5. meglia restaurant da l'entir mund. Da surmar vegnan dus cuschinunzs e quai èn *Markus Glockner* che vegn da New York a San Murezzan ed *Alvin Leung* che cuschina a Hongkong en in dals restaurants da luxus, il Bo Innovation, il numer 52 sin quest mund.



Tuts èn pronti en cuschina per il gourmet festival che ha quest onn lieu per la 20. giada.

FOTOS SWISS-IMAGE



En acziun vegn durant il gourmet festival natiralmain er il schef-pastizier dal Palace Stefan Gerber.